

■ GLOSSA

Tgi ha tema da l'um nair? Jau betg! Ma jau vegn!

(gièu amà avant e durant votaziuns ed elecziuns)

DA SILVIO CAMENISCH

Tgi ha tema da l'um nair? Jau betg! Ma jau vegn! Jau mez na tem betg l'um nair, betg vairamain, sun sur quella vegliadetgna or, fugel tuttina da halla en ed or, en ed or, per ma betg laschar pigliar. Ed insacur pigli er mai, damai che trasora da plirs umens nairs e dunnas er serran las ritschas e piglian! Facit: Serrar las ritschas tar far da pigliar e far da votar ha anc adina cuntanschì il vulì, quai è uschia e perquai faschain nus puspè noss gièu: Tgi ha tema...

Quels umens nairs politics e dunnas er opereschan giada per giada cun las temas da la glièud tar tuttas votaziuns, quels na lain or betg ina chaschun. Ir a chasegliar premuradamain recumandaziuns per votaziuns sut il pretext da las temas ha tar quels e quellas sistem e tradiziun obligaziun (nunschritta) da fracziun uniun bastiun partida communa fortezza na sai jau betg?, na sun betg inizià, betg insider. Ed uschia èsi vegnì sco i stueva, dueva e dastgava, il glindesdi



suentar. Der Montag danach.

Ils trames a Cuiira ed a Berna van a vender da porta a porta recumandaziuns per vairas votaziuns. Quests chasegliaders opereschan sco stà da spetgar betg tant cun la forza dal spiert che cun las temas dal pievel. Quest simpel pievel è gea vegnì educà da las temas, betg vair; tras ellas cun ellas ed en ellas, las temas, è noss pievel vegnì grond sco quest grond cuss. naz. u stoss jau dir cuss. naz. grond? hai jau uss sinceramain fadia cun la dretga posiziun da l'adjectiv!, ils signurs da las grammaticas ma duain gidar, grazia! Sa posiziunar endretg, manegià da vart

dretga dals dretgs e las dretgas, sa paja adina e prenda davent la tema.

Tge di noss signur cuss. naz. um pli grond da tuts! als podiums da persvader il simpel pievel avant las votaziuns. Il simpel pievel na sa betg savair tge votar, cun tgi e per tgi e tras tgi. Quel na sa betg savair insatge uschia, quels documents da votaziuns na gidan betg vinavant, betg vairamain, dentant il signur chasegliader cun ses musters da temas en la valisch! Na serrain nus betg las ritschas en furma da bastiun e dain giu il confess da Na! a l'iniziativa fitg malgista «1:12 per pajas gistas» cun persvasiun bunamain religiun, lura na stuain nus betg smirvegliar, vegni ora sco quai ch'i stueva, ma dueva e dastgava betg, di il tutsaviaivel, grond signur cuss. naz.. Dieus, con grond es Ti!

So! Ils davos dis avant la d'umengia da votaziuns dain nus anc ina giada tut e faschain ina evangelisaziun en num da las temas! Sa paja per saldo, vegns a vair n'hai jau betg gi raschun! Tgi ha tema da l'um nair? Jau betg! Ma jau vegn!